

solti quelli imputadi del taia, le spaliere in caxa di Cantoni a le noze, *videlicet* sier Zuan Francesco Da Mosto di sier Nicolò, sier Piero Grioni qu. sier Andrea et sier Andrea Vendramin qu. sier Luca, et do altri popolari, et uno prete bastardo di sier Andrea Marzello qu. sier Zuanne fo rimesso al patriarca. *Item*, sopra il secondo caso di la insolentia usada in la caxa da cha da Pexaro a san Zuan Degolado et altrove 4 zentilhomeni fono condanadi et uno popular, sicome domenega se intenderà a Gran Consiglio la sua condanason, et veneno zoso a hore 3 di notte.

Item, in le do Quarantie Civil vechia et Criminal fono expediti sier Polo Nani et li altri, sicome il tutto e le parte noterò qui avanti, et veneno zoso a hore 3 di note.

In questa sora a hore 2 di note et più fo fuoco in le volte nuove da cha Morexini in Rialto nuovo, in el ultimo soler, et per Vasalo capitanio era a la varda di Rialto fo con aiuto de molti studato.

A dì 7. La note e tuta la matina fo grandissima pioza, et havendo li Savii consultà di scriver una lettera a Roma a l' orator nostro in risposta di soe, per placar il papa di la indignatione auta per aver posto l'imprestado al clero senza soa saputa, la qual fo notà per Gasparo Spinelli secretario, et volevano far ozi Pregadi ma terminato indusiar a doman.

Vene sier Michiel Morexini qu. sier Piero in Collegio, qual ha le volte in Rialto nuovo, dicendo il foco esser sta messo a man eri sera nel soler di sora nel colmo et brusò do travi, fo reparado e tien sia sta messo per brusar le scritture di avogadori extraordinari e di soto le scritture di taxa-dori etc. *unde* per la Signoria fo chiamà li avogadori di comun e ordinato in Quarantia li dagi gran taia.

Vene l' orator di l'imperador per quella fusta fo presa a Castro per sier Hironimo da Canal fo vice proveditor di l'armada, el qual è sta da lui a dirli la cosa e come l'havea fatto danno a nostri, *tamen*

Intrò li Cai di X per certa lettera di Zara a loro drizata, intervenendo

Vene in Collegio sier Giacomo D'Armer soracomo, vien di Caodistria dove ha lassà la soa galla, et fu preso darli sovencion et restasse fuora, el qual disse è contento ubedir.

In questa matua in Quarantia criminal vene

sier Pandolfo Morexini consier di sora in loco de sier Hironimo Loredan è amalato, et leto parte dil processo fato per il proveditor di l'armada, et introduto il caso per sier Filippo Trun avogador di Comun.

Fu posto per li avogadori, che sier Vincenzo Baffo qu. sier Beneto, era retor a Schiros, mandato in questa terra et preso di retenir, fosse ben retenu-to : 3 non sinceri, il resto di sì, el qual è in l'armamento.

Item, poi leto una scrittura di Zuan Clemente Stanga milanese, è a stipendii dil re Christianissimo, preso di retenir, incolpado aver fato amazar uno in piazza di San Marco, el qual è nel monastero di Servi, voria salvoconduto di apresentarsi per mexi 8 perchè li bisogna in questo tempo servir il re Christianissimo, *unde* fu posto farli salvocondutto per mexi 2, et fu preso.

Da poi disnar fo Collegio di le biave et preseno li pistori possino comprar formenti di orzo che prima non poteano comprar si non padoani, trivisani, di Mestrin e di Friuli, *item* possino far formenti di gran grosso, ai qual sia fato il calamier. *Item*, preseno comprar stara 5000 di orzo di la Signoria ubligadi a la Zeca e quelli dar a la gente d'arme.

1532, die 6 martii, in duobus Quarantiis. 279

Da poi redutò il Conseio di XL Criminal et Civil vechio volte a requisition di sier Anzolo Gabriel, sier Alvise Badoer, sier Stefano Tiepolo avogadori extraordinari, per il caso di sier Polo Nani fo proveditor zeneral in campo, Zuan Andrea da Prato el cavalier colateral zeneral, sier Francesco Gritti di sier Domenego fo pagador in campo, Zanin Borella Bergamo sindaco di quel territorio et Francesco Laurelio, tutti 5 presi di retenir, et sono retenuti et tre absenti. Dapoi le disputation fate *hinc inde* sicome ho notato ai tempi soi, hozi da poi disnar compito di parlar fo numerato il Conseio, numero 77, et vene in loco di sier Hironimo Loredan consier è amalato, sier Sebastian Justinian el cavalier, consier di sopra, al qual tocò per tessere di esservi a meter le parte, poi preso il procieder et prima :

Fo messo per ditti Avogadori extraordinari procieder contra Constantin dil Duca cogitor di la banca, absente, et fo 73 di sì, 1 di no, 3 non sinceri.

Fu posto, per sier Sebastian Justinian el cava-